

大乘理趣六波羅蜜多經卷第五 多益

大乘理趣六波羅蜜多經卷第六 多六

大唐尉賓國三藏 般若 奉 詔譯

安忍波羅蜜多品第七

尔時佛薄伽梵顯說如是淨戒波羅蜜多已  
時慈氏菩薩即從座起偏袒右肩右膝著地  
頂禮佛足而白佛言世尊菩薩修行安忍波  
羅蜜多云何進求而得圓滿然此安忍復有  
幾種若修行者功用如何惟願開示我等樂  
聞

尔時佛薄伽梵讚慈氏菩薩摩訶薩言善哉  
善哉汝今為欲利益安樂一切衆生能問如  
是甚深義趣汝今諦聽善思念之吾今為汝

分別解說善男子當知生死涅槃悉皆平等  
以無分別是名安忍波羅蜜多復次若有愚  
下狂亂衆生來罵辱者皆忍受之譬如醉象  
難可禁制應以鐵鉤而調伏之瞋心醉象亦  
復如是以忍辱鉤而制禦之令其調伏名為  
安忍波羅蜜多復次若諸有情為彼三十六

俱胝天魔鬼神藥叉羅刹而來侵害菩薩唯  
將安忍波羅蜜多能破彼軍乃至八萬四千  
煩惱怨賊欲摧伏者亦以安忍而除滅之非  
唯如是天魔大軍煩惱怨賊乃至極下微小  
怨賊亦以安忍而調伏之是名安忍波羅蜜  
多復次譬如王子善習王法父王崩已次紹

王位當以正法頒告四方率土之內悉皆奉  
行五種正法云何為五一不斷生命二不行  
盜竊三離欲邪行四不虛誑語五不分外賦  
稅財物若王境內有犯殺者其王便獲第六  
分罪偷盜邪行及以妄語亦復如是何以故  
若法非法王為根本於罪於福第六一分皆

屬於王菩薩摩訶薩亦復如是心為國土大  
悲為王以五忍法宣布境內所謂打罵忿恚  
戲弄如是五法皆安忍之若違犯者獲大重  
罪復次慈氏譬如農夫欲種植時為引水故  
先治溝渠興功之次中遇山石穿掘無由於  
斯便止菩薩摩訶薩則不如是於生死流轉

大曠野中欲穿智渠引甘露水既修習次遇  
瞋恚石無方除遣唯有安忍審諦觀察而穿  
破之復次一切國王大臣長者居士恒以瓔  
珞而為莊嚴諸佛法王大菩薩等常以安忍  
瓔珞而自嚴身若遇衆生非理欺負大悲安  
忍而救護之又此安忍與苾芻苾芻尼而為

多六

二

師範以信進念定慧而為林樹以淨戒為枝  
葉於此林內瞋火欲起焚戒枝葉無由撲滅  
以安忍雨而得滅除現在未來一切苦難永  
無憂患無安忍者於現世中行住坐卧無有  
安樂於未來世豈有樂邪菩薩摩訶薩以安  
忍力而為甲冑彼造罪人為旃荼羅以瞋恚

手執妄想弓放麤語箭射安忍甲而彼弓箭  
自然摧折安忍甲冑一無損壞其碎弓箭變  
為蓮華當知菩薩如是修行是則名為安忍  
波羅蜜多復次譬如世間阿伽陀藥能除自  
佗一切毒病菩薩亦尔忍伽陀藥能治自佗  
一切瞋恚煩惱毒病是名安忍波羅蜜多譬

如世間明月寶珠商主持行度大曠野砂磧  
之中絕無水處於夜月中持珠向月以器承  
之水即隨出商主飲之得度曠野菩薩亦尔  
持此安忍明月寶珠度於生死曠野磧中絕  
無智水煩惱之處於佛智月持忍辱珠承佛  
法水菩薩飲之出於生死至涅槃岸復次慈

氏譬如大地一切草木依之得生一切有情  
依之而住安忍亦尔一切菩薩摩訶薩於十  
地中修習六種波羅蜜多依之生長由斯而  
住復次如有梯橙極為高大衆生登陟直至  
梵天安忍之梯高大亦尔菩薩登陟至天中  
天復次如巧畫師畫種種像莊彩成就安忍

多六

三

畫師亦復如是莊嚴功德圓滿成就復次譬如虛空起大密雲降注洪雨瀑水汎漲漂蕩一切草木華果入琉璃河轉至大海菩薩亦尔心如虛空能起一切大悲密雲降大法雨安忍瀑流漂蕩一切瞋恚草木愚癡華果流入智河轉至涅槃清淨大海復次菩薩雖見生死流轉諸苦以安忍力代為受之經無量劫不辭厭倦亦無棄捨而取涅槃復次菩薩摩訶薩以安忍力能捨一切頭目髓腦身肉手足及與身命心無憍惜凡夫無智聞之驚怖身毛皆豎何能捨之菩薩如是以安忍力所生之處容貌端正一切衆生之所樂見於大會中常為諸佛之所稱歎復次菩薩摩訶薩安住忍力堅固不動如妙高山旋嵐猛風所不能動忍妙高山亦復如是瞋恚猛風所不能動復次一切外道因惡知識生邪見心修諸苦行裸形自餓五熱炙身投巖赴火謂得生天不信正法菩薩見已起大悲心示同

苦行倍過於彼是諸外道尊敬菩薩以為師範然後導之示以正法令彼邪徒住於正見復有外道而作是言此身有我住在心中如大母指而無障礙亦無形相唯天眼者方得見之而此眼根為我侍者眼既得已尋報我知耳鼻舌身意亦如是以此因緣若有衆生毀罵我者人能殺之得生天上忍受罵者死墮三塗譬如多人同事一將若毀我將衆共殺之若不殺者衆人有罪菩薩以安忍力愍彼邪見皆忍受之以種種方便除彼邪見譬如時雨隨彼草木而能滋潤增長成實菩薩安忍亦復如是尔時薄伽梵而說頌言

如天欲雨蟻出穴 聚土為封作穴居  
 父母不淨集成身 妄識於中執為我  
 相續色力恃豪強 智者諦觀如幻焰  
 一念之頃作微塵 如象蹈封皆散壞  
 瞬息刹那速生滅 行住坐卧皆為苦  
 若了身色苦無常 智人於此何貪著

多六

四

諸天梵住苦行者 毒蛇視觸無能害  
設有中傷呪藥解 無常毒螫誰爲救  
善法易修悉棄捨 欲樂敗類苦貪求  
智者觀之無所成 垢弊之衣難染著  
菩薩摩訶薩應爲外道說無我法汝所執我  
爲在內邪爲在外邪前際去邪後際去邪汝

言有者汝命終時應能救汝既不能救明知  
無我譬如忠臣一心奉主若在危難主必救  
之今既不能定知無我若有我者應得自在  
云何乃被無常壞邪而諸衆生被無常鬼衆  
苦所逼肢節分離奄然而逝若有我者應得  
免之既不免離故知無我以是因緣汝諸外

道從無始來奉事於我造諸惡業受苦無窮  
當知此我無少恩分汝久事佗捨汝而去遂  
將汝身付諸惡獸豺狼虎豹而爲啗食然我  
棄汝別覓餘身從無始來捐棄汝等若計其  
數無量無邊現在未來亦復如是  
復次汝若謂心即是神我身爲僮僕當知此

身即是我所從無始來受身無量莫知其數  
如是諸身爲一我邪爲多我邪若我多者即  
是無常以無常故我義不成若我是一即應  
常住恒守一身不應移去以不住故一亦不  
成由此因緣汝應思察多我一我義並不成  
以是當知心非是我復當觀察身非我所亦

身六

五

非僮僕身若屬我行住坐卧生老病死須我  
更分我未教勅相次而來明不屬我若屬我  
者生應常生不應老死行住坐卧亦復如是  
改易非常定非我所以此定知無我我所復  
次當知所執我者汝之大怨何以故汝於前  
世積集善根五欲果報今世受盡現在造作  
種種惡業以業力故付與獄卒若有我者何  
不相救菩薩摩訶薩以安忍力於我所惡  
鬼之中拔濟有情皆令正見離我我所見一  
切法本性空寂是名菩薩修習安忍波羅蜜  
多復次慈氏猶如有人爲護子故造作呪術  
令諸惡鬼不得侵害菩薩亦亦用安忍呪護

諸衆生瞋等怨賊無能損害復次慈氏譬如有人爲刺刺脚欲以諸皮徧覆大地於上遊行免有憂患智者問曰汝所求皮欲作何事此人具報如上因緣智者訶云咄哉愚人不應如是但以少皮用充革屣足得行李不被損傷何用多皮覆於大地凡夫衆生亦復如

是徧造怨害持刀欲殺大地怨家菩薩見之深生悲愍但以安忍而爲革屣護汝身心何有衆怨持刀徧害是則名爲安忍波羅蜜多復次有人以毒惡言種種毀罵菩薩聞之不應卒暴而起瞋心當觀察之如是罵者爲是誰耶受毀罵者復是誰耶彼此二身各十二

處眼處見色耳處聞聲鼻處嗅香舌處嘗味身處覺觸意處知法而是眼處實非是我若非我者自佗眼處誰過失耶若有過者應須治罰如是觀察俱無過失既無過失誰受誰罵而瞋恚邪如是觀察乃至法處亦復如是十二處外更無一物罵者受者二俱是空以

此思惟瞋心頓息若聞麤語應諦觀察如是語言何者是麤麤語二字生不同時麤時非語語時非麤刹那生滅各不相待二字尚無况多毀罵以是觀察百千劫中作是麤言不成罵辱又復觀察能罵之人及所罵法二俱無常刹那不住何有瞋邪以是當知過去已

多六

六

滅未來未至現在不住罵法既空我身亦亦同彼無常生滅不住以不住故一切皆空作是觀時無量怨賊一時銷滅若離此觀取相分別但名安忍不得名爲波羅蜜多五蘊無我乃至十八界等悉亦無我如幻如化毀讚平等本性空寂亦復如是復次慈氏菩薩摩訶薩見毀罵者當生憐愍如是之人瞋魔所持煩惱所覆作是毀罵我今爲欲辟除此魔應善修學忍陀羅尼不生瞋恨無令瞋恚及餘煩惱損害衆生我若瞋者鬼魅我身由此因緣於彼罵者生大悲愍而安忍之雖能如是但名安忍若離分別是則名曰波羅蜜多

復次慈氏菩薩摩訶薩行安忍時若見有人執持利刀斷其手足當於是人生欣慰心善知識想猶如有人施已歡悅我於今者得大福報於彼受者常懷恩德傍人見之皆生隨喜菩薩亦亦見割截者生大慶慰除我罪業施我法財由爲我故受惡名稱失於人天解

脫之樂受三塗苦以是因緣爲我善友作我良伴成我安忍波羅蜜多我於彼人應生敬重乃至菩提不忘恩德況反生嗔若起瞋恚是負恩德由是緣故倍生敬心作善師想雖能如是難忍能忍由於自他未亡分別但名安忍不得名爲波羅蜜多復次菩薩住閑寂

處而有人來謗菩薩言汝不與取作媼欲行打罵治罰菩薩摩訶薩而安忍之作是思惟非佗過失是我宿世曾謗於佗打罵治罰以我餘殃招彼治責彼因害我當墮惡趣應於是人生大悲愍復自思惟我今此心極爲姦詐畏墮地獄生安忍心又欲自成忍波羅蜜

令割截者當墮三塗如是思惟深生慙媿菩薩是時見已過已於割截者生媿恧心善知識想深生尊重但名安忍非波羅蜜多何以故由於自他分別故復次菩薩了瞋恚法諸苦所因知行安忍萬行根本以是因緣而行忍辱但名安忍非波羅蜜何以故由於善

惡生分別故復次菩薩觀五蘊身五種過失衆苦所集剎那無常五種不淨三十六物無我我所一切皆空外道邪見執身安樂常住無變是清淨法有我我所菩薩諦觀此五種法一切有情亦復如是既知是已聞罵不瞋讚譽不喜但名安忍非波羅蜜多復次慈氏

略說菩薩安忍三十二種所謂無貪是安忍不害是安忍無熱惱是安忍無瞋是安忍無恨是安忍無忿是安忍無諍論是安忍不染欲境是安忍能護自佗是安忍順菩提心是安忍無分別心是安忍不著生死是安忍順業果是安忍身清淨是安忍口意清淨是安

忍堅固不退是安忍言說自在是安忍無偏  
計是安忍自覺聖智是安忍將護彼意是安  
忍修四梵行不隨禪生是安忍於人天樂得  
自在是安忍相好圓滿是安忍梵音深妙是  
安忍滅除諸惡是安忍遠離慳垢是安忍除  
斷嫉妬是安忍捨諸怨賊是安忍近菩提分

是安忍離諸不善是安忍樂處寂靜是安忍  
獲諸佛法是安忍慈氏如是三十二種安忍  
波羅蜜多菩薩修行能得無生法忍速成阿  
耨多羅三藐三菩提

復次慈氏云何名為安忍波羅蜜多若人惡  
罵當觀此聲猶如谷響若被打時當觀此身

猶如鏡像若被瞋時當觀此心猶如幻化若  
見忿怒當觀此心性無誼動若得利養當觀  
此心自性調伏不生歡喜若失利養當觀此  
心善妙寂靜不生瞋恚若遭毀謗當觀此身  
猶如虛空不應加報若遇讚譽當觀自身性  
無我慢而不高舉若得稱歎當觀心性本來

空寂不生忻慰若被譏嫌當觀本心性離怖  
畏不生憂感若遇苦時當觀法性本無逼迫  
不見苦相若受樂時當觀實性常住不變無  
苦樂相菩薩摩訶薩住安忍時如是八風不  
能動轉何以故以菩提心住真實相離於彼  
我見法身故復次有不安事皆忍受之為欲

降伏諸魔怨故當行一切難行苦行為調外  
道諸邪見故慈氏當知我今略說安忍波羅  
蜜多

復次慈氏若觀無常離彼我相心得安忍非  
真實忍若觀諸法善不善相心得安忍非真  
實忍若復諦觀十二處忍於諸根塵離恚罵

相而得安忍非真實忍若觀恚罵以為顛倒  
忍為真正辯邪正思非真實忍復次見忍有  
理恚罵無理此取相忍非真實忍復次住八  
正忍離八邪忍道非道忍非真實忍復次不  
觀諸法無常無我不淨苦忍唯觀諸法常樂  
我淨無生法忍此相違忍非真實忍復次於

多六

九

空法忍諸見不忍無相法忍有相不忍無願  
法忍有願不忍無行法忍有行不忍無煩惱  
法忍有煩惱不忍諸善法忍非善不忍出世  
法忍世間不忍無過法忍有過不忍無漏法  
忍有漏不忍涅槃法忍生死不忍如是諸忍  
是對治忍非究竟忍

今時慈氏菩薩摩訶薩白佛言世尊如是忍  
者既非究竟云何名曰究竟忍耶惟願如來  
分別解說今時薄伽梵告慈氏菩薩摩訶薩  
言善男子真實忍者以正智慧了一切法本  
性皆空即此空性與一切法本性無二故一  
切法性空性正智本性清淨無二無二分無

別無斷故以是當知世間法即是空空即是  
世間法二法本性不相離故如是忍者名究  
竟忍復次以正智慧了一切法性即無相性  
無相性即一切法性本性無二故一切法性  
無相性正智本性清淨無二無二分無別無  
斷故以是當知一切法性即無相性無相性

即一切法性二法本性不相離故如是忍者  
名為究竟忍復次以正智慧了一切法性即  
無願性無願性即一切法性本性無二故無  
願性一切法性正智本性清淨無二無二分  
無別無斷故以是當知一切法性即無願性  
無願性即一切法性二法本性不相離故如

是忍者名究竟忍復次以正智慧了一切行  
性即無行性此無行性與一切行性本性無  
二故一切行性無行性正智本性清淨無二  
無二分無別無斷故乃至如是忍者是究竟  
忍復次以正智慧了煩惱性即無煩惱性無  
煩惱性即煩惱性本性無二故煩惱性無煩

惱性正智本性清淨無二無二分無別無斷  
故乃至如是忍者是究竟忍復次以正智慧  
了一切善性即不善性不善性即一切善性  
本性無二故善性不善性正智本性清淨無  
二無二分無別無斷故乃至如是忍者是究  
竟忍復次以正智慧了出世法性即世間法



性世間法性即出世間法性本性無二故出世法性世間法性正智本性清淨無二無二分無別無斷故乃至如是忍者是究竟忍復次以正智慧了無過失性即過失性過失性即無過失性本性無二故無過失性過失性正智本性清淨無二無二分無別無斷故乃至如是忍

至如是忍者是究竟忍復次以正智慧了無漏法性即有漏法性有漏法性即無漏法性本性無二故無漏法性有漏法性正智本性清淨無二無二分無別無斷故乃至如是忍者是究竟忍復次以正智慧了涅槃性即生死性生死性即涅槃性本性無二故涅槃性

生死性正智本性清淨無二無二分無別無斷故乃至如是忍者是究竟忍佛告慈氏如是真實究竟安忍於一切法非自非佗非有非無非生非不生非滅非不滅獲此忍者名真究竟無生法忍是名安忍波羅蜜多佛說此安忍波羅蜜多時慈氏菩薩而為上首

與無量諸大菩薩摩訶薩眾及此大會異口同音讚薄伽梵言善哉善哉希有善逝甚奇世尊即以無量珍妙供具而供養之所謂種種妙香瞻蔔華香燒香塗香末香種種華鬘衣服繒綵幢幡寶蓋擲虛空中以為供養種種音樂而為娛樂種種歌頌讚歎如來是諸

多六

土

眾生聞佛說此安忍波羅蜜多不驚不懼不怖不畏悉得如來真實法忍所散香華種種供養在虛空中徧滿三千大千世界爾時薄伽梵告慈氏菩薩摩訶薩言善男子汝應安置如是種種華香衣服乃至幡蓋時慈氏菩薩摩訶薩白佛言世尊我已安置如是香華種種衣服各各置在諸菩薩等天龍眾會本身之中而為處所爾時慈氏菩薩說是語已即入一切色身三昧入是定已所有三千大千世界徧滿虛空種種華香衣服繒綵乃至幡蓋以定力故悉入慈氏臍輪之中不相障礙而諸供具亦不

減小菩薩之身亦不廣大

爾時無盡藏菩薩摩訶薩問慈氏菩薩摩訶薩言善男子此三昧名字何等住此定中能令如是諸供養具悉入臍中汝身不增衆物不減慈氏菩薩言善男子此三昧名普入一切色身無盡藏菩薩復言大士此三昧神變

境界其事云何慈氏菩薩言仁者三千大千世界一切所有入我臍輪我身不增彼像不減何以故法性如是爾時會中或有菩薩天龍鬼神人非人等竊作是念我等欲見是三昧境界神變不知云何爾時薄伽梵知諸菩薩天龍大衆心之所念告慈氏菩薩摩訶薩

言善男子汝當現此三昧神變令衆同知時慈氏菩薩久已脩習如是三昧善得純熟無諸障礙令諸菩薩佗方大衆及在此會諸苾芻僧及佛世尊一切悉入慈氏身中而諸有情亦無驚怖得未曾有身心安樂譬如東方過無量阿僧企耶世界有世界名寶瓔珞莊

嚴而彼衆生所受用物皆以種種珍寶而爲莊嚴受諸快樂而此身中天人大衆所受快樂如彼世界等無有異此諸大會皆悉了知在慈氏身都無障礙爾時慈氏菩薩還攝神力時諸大衆及佛世尊各復本座儼然而住是諸大衆一切有情都不覺知有往來相

多矣

十二

時無盡藏菩薩白慈氏菩薩言希有大士此三摩地神變之事得未曾有昔所未見慈氏菩薩言仁者非但此會一切大衆入我身中設以三千大千世界諸妙高山及十寶山大鐵圍山大海江河日月星辰天宮龍宮諸尊神宮五趣四生人非人等悉內身中亦無妨

礙我身不增彼亦無減是諸衆生亦不覺知有往來相法性如是况此會邪時薄伽梵說此安忍波羅蜜多及現大神變時會中有七十六那由多人天皆發阿耨多羅三藐三菩提心三萬二千菩薩皆得無生法忍佛告慈氏若有善男子善女人暫聞此安忍波羅蜜

多名能生信心是人決定不墮地獄鬼趣傍  
生於阿耨多羅三藐三菩提永無退轉我今  
說是安忍波羅蜜多究竟圓滿利益安樂一  
切衆生

大乘理趣六波羅蜜多經卷第六 多六

大乘理趣六波羅蜜多經卷第七 多七

大唐罽賓國三藏 般若奉詔譯

精進波羅蜜多品第八

尔時薄伽梵說是安忍波羅蜜多已時慈氏  
菩薩摩訶薩即從座起偏袒右肩右膝著地  
合掌恭敬而白佛言大聖世尊已說安忍波

羅蜜多應當廣說精進波羅蜜多菩薩摩訶  
薩應云何住云何降伏云何修行云何圓滿  
精進波羅蜜多惟願世尊分別廣說尔時薄  
伽梵告慈氏菩薩摩訶薩言善男子汝今諦  
聽善思念之吾當為汝分別解說所謂修餘  
五種波羅蜜多皆精進力而能成就精進波

羅蜜多謂身口意此三善業皆因精進方得  
發生於三業中意業最勝菩薩摩訶薩修習  
意業有二種心一者精進二者退轉所謂發  
起菩提心是精進止息菩提心是退轉云何  
發起於諸有情起大悲故云何止息住我空  
故云何發起攝取一切衆生故云何止息捨

一切衆生故云何發起於生死中無疲倦故  
云何止息求出三界故云何發起一切悉捨  
故云何止息輕心不施故云何發起堅持淨  
戒故云何止息毀犯戒故云何發起善住安  
忍故云何止息不修忍辱故云何發起修集  
善根故云何止息懈怠懶墮故云何發起住  
禪定故云何止息心散亂故云何發起智慧  
相應故云何止息無明相應故云何發起多  
聞善說故云何止息不聞正法故云何發起  
積集智慧故云何止息取相分別故云何發  
起觀蘊如幻故云何止息於蘊生厭故云何  
發起知處如夢故云何止息永滅根境故云